

四庫全書

集部

欽定四庫全書

集部

弇州四部稿卷四十三

詳校官侍讀學士

臣陸伯煢

中書

臣

劉源溥覆勘

總校官原任中允王燕緒

校對官中書

臣張

垣

謄錄監生

臣李青標

欽定四庫全書

弇州四部稿卷四十三

明 王世貞 撰

詩部

七言律九十首

乙亥元日獨坐試筆時余五十矣

江城鈴閣隱欹梧竹影徐移拂茗鑪
雪後鄖山俱獻玉
春來漢水不藏珠
將登服政心猶懶
欲數前非念已徂

了却朝天無一事已拚清興到屠蘇

歸思并寄懷留省太宰劉公少司馬凌公少司空

徐公

屈指曾停雪夜舟雙旌宛轉更西游功名向好應知足
朋舊雖稀漸到頭孤夢自懸鍾阜月尺書難遡漢江流
莫愁白簡妨人事能遣青山近沃洲

寄送廷尉孫公渡襄北上時鄖鎮自公疏開督府
申軍令不佞忝繼武云

一疏明光有大邦雄開幕府擁旌幢前茅曙色通秦嶺
後吹春聲疊漢江蕭相規成元畫一羊公名在雅無雙
欲知鈴閣留題處時復芸香透瑣牕

其二

兒童竹馬漢江邊不數銅鞮拍手年但是征南書負癖
還應大理棹登僊青編倡雪猶存郢白簡雄風已到燕
三事故人如見及可容平子賦歸田

寄肖甫

音塵莫恨薊門疎
鄖府天西遠自如
地盡岷峨唯鳥道
江分蜀漢少魚書
諸賢講德甘棠後
萬事驚心小草餘
聖主只今求劔切
可因春興賦潘輿

少泉太僕公謝人間久矣獨有喜余遷太僕中丞
二律見寄鄖中賦此奉酬兼簡猶子時厚太僕

京山南去鬱嵯峨
矯首孤雲奈爾何
楚水可無魚素到
王家從昔馬曹多
緘開一字成珠玉
句就千秋讓薜蘿
莫倚竹林憎俗物
也能兼爲阿咸過

奉答故中丞曹丈并贈二首

霜威不入鬢絲春誰識三朝栢府臣
酌月獨成橫槊句
醉花翻愛吐裊人放懷雲夢時時闊
論舊山陽字字真
尺牘向來江表擅却因驚坐許陳遵

吳人陳道易善書公首言之

其二

章華臺畔百花枝花底春迷白接羅
埋照自來多寓酒
逃名不盡爲談詩聽殘估客西陵樂
忘却中丞南部時
任是江山能殢興舍人還有治裝期

伯起得余訊札黏之屏上夜爲風雨所摧成詩見
貽聊爾謝答

別思紛蕤不記年吳閭懷舊更依然愧非天外銀鈎畫
博得山中玉案篇登善已無屏脚分孟皇方有帳頭緣
請看章水浮沈後猶作風流勝事傳

清明遇雨

昨歲清明指冀方今朝寒食滯鄖陽兒曹上塚亦隨俗
客子思親偏斷腸四十九年年已去一百五日日初長

母論積雨斷新火縱得餘光非故鄉

歐禎伯自嶺南寄書經歲始達時已謁公車矣

吳江船送孝廉回屈指三看動琯灰海內幾人同調在
天南萬里尺書來心隨合浦能飛葉句似羅浮寄遠梅
見說公車新待詔不知東閣爲誰開

子與自閩遠使相訊道失所貽書而詩篇幸存賦
此報寄

一疏除書便各天梅花開落動經年已拚魚素浮沈後

幸有驪珠次第傳
鄖水下從楊子盡
女星南向越臺懸
亦知握手前期在
塵世那能事事圓

其二

卧病山城未解顰
新詩一喜一酸辛
青雲論舊年年少
白髮關心事事真
已自有珠貽漢浦
幾時看劍合延津
鄉園稍近無拘束
去就清時可細論

寄贈李惟貞侍御時清戎三楚將赴嶺南

十道兵符事更新
少陵歌罷點行頻
那知使者車前淚

轉作君王筆底春五嶺可應任尉成三苗今是舜階人
青燈促膝還思郢愧殺囊封上紫宸

過龍泉觀冒雨行即景

峭風含雨自成悽宛轉襄城轍漸迷巖電忽垂疑帝笑
江雷初上似兒啼遙旌破壁看初沒雜樹含烟暈却齊
恍忽淮南朝帝過西巖喔喔午時雞

由太和登絕頂二首

千盤轉盡見三門七十二峯朝至尊下挿香鑪勝廬嶽

中懸天柱即崑崙琅璈挾籟晴疑雨金殿搖光夜不昏
欲指羣方無可問青山處處白雲屯

其二

絳節朱幡縹緲間縱非天漢不塵寰平超五嶽王公位
肯數三峨伯仲山千嶂霧深銀作海九霄雲淨玉爲關
空餘沆瀣零仙掌消渴相如可再攀

宿南巖宮

欲凭籃筍數鬼我刺眼翻愁勝地多絕頂夜懸金觀出

斷崖晴挾火輪過池從太乙真人卧亭憶南薰帝子歌
莫話古來冲舉事一官雙鬢已蹉跎

謝李侍御孟敬惠刻書數種

使君真有五車書不惜分光慰索居中壘業傳饒七畧
征南癖在喜三餘已無它技同鼯鼠從此殘緣結蠹魚
更道酉陽西去穴縹緗玉簡定何如

邀助甫迎恩宮作

三月花飛懶下堂出游端自爲薇郎尊前小語青山近

城裏玄宮白日長
欲折松枝充麈尾
可辭華土拭干將
人間對有狂名在
不信相逢老不狂

三月晦日助甫見甫於使院清美堂聯句因贈

鈴閣初開興不孤
醉來時復對烏烏
山低送綠看時失
葉密欺紅數欲無
雅爲戀春期秉燭
那知代月有聯珠
明朝更是清和候
蕭洒齊紈佐玉壺

移舟餞助甫分韻得牛字

廩子城南看放舟
鳴笳疊鼓不寬愁
過雲石迥如人立

破壁江能學字流此際雄譚還白馬
早時真氣失青牛
亦知別後無他事肯爲參峯暫少留

送李孟敬侍御還臺

十年貪識鳳毛難曾借中興疏草看家有一書司馬法人傳八使惠文冠
霜驅夙霧過衡遠風送餘波上漢寒
共道朝廷尊自若仍教李勉向臺端

送趙中丞良弼自楚開府還臺公舊牧荊州爲中興循吏第一今其還也獨晉左丞

共誇元白夾江除來往魚緘問索居見合兩邦爲反坫
忽傳三殿有徵書先朝舊露荊州冕全楚今攀御史車
不獨風稜堪獨坐即論循吏許誰如

寄甘肅侯中丞儒宗

回首齊門和缺歌辟書先後起烟蘿幕中明月堪相共
鏡裏秋霜奈我何燕領古來金印遠虎符西去玉關多
那能醉爾葡萄酒射鹿還煎熟洛河

寄贈羅中丞國華自貴竹移鎮西川

除目中樞有大名忽傳開府更西征已收羅鬼刀耕戍
憑取蓬婆鐵作城蜀道時清偏自易雪山公到不爲輕
亦知小鎮堪投老牢落牀頭缺自鳴

中丞曹丈手錄新詩見示卒業感而有謝

山城春晚足音微漠漠停雲四望非忽訝漢珠神女贈
總緣荆玉國工稀聲排仄琯吹相協字挾雲霞看欲飛
却笑古來吳季子楚風論未便成歸

灌甫宗正寄示所著新書奉贈

浮雲鬱鬱大梁城公子名高不愛名但自壁間尋孔氏
何須席左待侯生藏書嵩嶽中天色紀瑞黃河聖代清
却憶荊州王祭在從軍詩好繼東京

內鄉李翁少偕計公車不第遂棄歸以長君翰林
封顧翁時時稱鄉貢進士扁舟見訪談詩論世事
多感慨不平語於其別也贈之一詩

拂袖公車成隱心璽書元解覓山深逃名不作唐供奉
得句還稱李翰林老向唾壺翻擊節愁來挾瑟問知音

丹崖丹水春何限莫憶尋常賣駿金

明輔方伯走使馳書數千里詢我漢上盛言新築
不減祗園然頗以索居爲歎聊成二律奉贈因抒
鄙懷

憐君新築晉祠幽五柳當門山滿樓書永琴樽寬自得
春深車馬僻難求孤雲似客能分坐片石聞禪解點頭
猶有舊交時攬念西風吹鴈下襄州

其二

紫衫拋後鬢金鬟六見桃花源水春題筆不爲縣上語
灌園偏憶漢陰人行藏盛世難論跡離合中年總愛身
若問宦情何所道蒼生戟耳生輪

助甫起家陝西左參有贈

初傳分省京兆

先朝綠鬢尚書郎
鮑水忘饑歲月長
看著鵲冠知有托
罷含雞舌尚餘香
公車忽借臨三輔
京兆今應數二張
見說華陰山下土
能添廣武匣中霜

其二

已從巖穴謝時榮
尺一傳來客盡驚
馬首掌蓮開太華
篋中詩草見西京
病當清世那堪久
身爲知音稍解輕
欲識保釐新政就
試聽銅雀有雙鳴

見甫與余交久矣
忽以書幣及詩來
贄請執門人禮
以此辭謝

軍城烟柳暮蒼然
忽墮孤鴻悲几邊
今日子雲仍問字
當時文舉已忘年
書來繡段難爲報
家有青箱敢吝傳
莫道鄖江無柳折
也曾相繫孝廉船

宋文望之見示華陽館集志謝

久矣談天碣石荒誰堪別館號華陽
劍從江右光含斗書學淮南字有霜
此去中興多大雅嚮來孤憤半清商
亦知行部陽春色倘許新題到草堂

兵憲王君陽德數過弇山園頗述泉石之美走筆奉寄

一壑中年屬謝家祇緣青紱離青霞
衡門過客題衰鳳小隊春間駐浣花
已借使君爲地主可無詩句憶天涯

鄖江亦號羊公府卧閣蕭條負歲華

叔寶約游武當不至欲按余詩作圖聊爾次答且

寓嘲

虛傳消息到襄州濟勝唯應踏虎丘金作夢山空弄色
珠懸漢水不成投還憑摩詰詩中畫寫作宗生卧後游
必待他年婚嫁畢桃花爛却武陵舟

喜助甫少參復過鄖城

鄖江星象往來頻春起南陽冬入秦負弩迎將符節使

同舟看是角巾人從來俠客深然諾豈合明時見隱淪
節度莫誇襄漾好白茅先授九邊臣

邀助甫兄弟登城北樓

憑欄極望思雄哉眼底初逢宋玉才疊翠爭排千雉入
空青忽破片鳬來雙飛鴻鴈分雙影一曲驪駒盡一杯
妬殺銀箏玫瑰柱聲聲彈出古輪臺

送助甫使君赴河西

與說涼州樂事深便應分手莫沈吟調將蹀躞名西極

種就葡萄勝上林，但使酒泉長似酒。
不須金谷徧成金，魚腸喚汝終投筆。
燕頷封侯始稱心。

其二

貝帶貂裘錦作幃，然明西牧許誰雙。
時時屬國來稱款，處處邊城號受降。
鹿血煎腸成熟洛，駝酥滴乳點春缸。
賀蘭山壁從渠大醉瀋，淋漓筆似扛。

丙子元日試筆

軍城衙散不須開，徐撥金壚煖篆灰。
初日似偏羊傳閣。

早春難到濮王臺辛盤婦怯他鄉味
栢酒兒驚最後杯
忽憶朝天吾季在玉珂聲自未央回

送王中丞汝文提督操江

折衝元自漢庭聞
柱後新裁上切雲
一劒畫將天塹地
千帆教就水犀軍
臺城畫擁韜鈴色
幕府春生組練文
却笑當年渾共濬
與君同姓不如君

其二

惠文霜色隱昆吾
玄武湖風響僕姑
三翼盡環青雀舸

一軍俱號黑雲都按章諸部多拋綬趨府何人不佩符
共說中朝山吏部論兵暗已合孫吳

穀日登鄖城東北門樓時四山雪霽因題曰春雪
樓而係以二律用示郡僚

鄖城東北似齊宮四塞烟巒望望同忽結樓臺銀海上
盡收天地玉壺中從他柳絮能千點笑殺梅花僅幾叢
撫罷朱絃君自聽那能不讓郢人工

其二

雪後登樓思渺然南爲梁苑北秦天微吟謝氏成珪句
忽憶陽生種玉田報瑞青祇裝暫改淩空白鳳羽全捐
俱言此日初名穀太史應書大有年

曾中丞以三自西川入爲少司馬過郢北上

青雲紅旆擁金鞍過郢毋辭春雪寒此去長安真自近
方知蜀道不爲難西川慣領中書印掌武初辭柱後冠
多少籌邊樓上策漢庭先已縛呼韓

豫章人至不得用晦書却問之

虛從鱗羽問離居各有相思少破除斗畔龍文誰解識
枕中鴻寶近何如君有黃白之好神交總是難逢語才大還成
自試書誇殺芙蓉池上月那能折簡致應徐

寄余德甫徵君

中原帝網正彌空萬羽葳蕤傍北風不散斗邊雙紫氣
忽冥天外一孤鴻西山秀色談詩後章水飛流攬鏡中
敢倚竹林人漸貴五君無處著王戎

上巳初晴同戚生小亭對酌

三月三日日初新雨風風成一春柳條媚景乍舒盼
桃花勒寒微放顰會稽山陰足禊事長安水邊多麗人
故鄉京國那在眼與子且愛樽前身

董中丞貽書且有解衣之貺聊此附謝

商於山碧鎖嶙峋不隔郵筒來往頻縞紵欲酬難比札
復陶將被遠誇秦青雲漸有論文地明月初無按劍人
自是神交能勝面古來千里號比鄰

寄敬甫考功時拱辰太僕初歸里

漳河霜雪捲絲綸誰念先朝啟事臣
廢後笑他顏遠句
悟來完得義熙身
從教閉戶難逃俠
但是收書不畏貧
此際遲鴻臺畔色
恍如雙劍合延津

陳玉叔學憲見訊且索余手書聊爾答寄

四塞軍城黯不舒
雙鴻宛轉下前除
械開漢浦珠貽後
句就已江錦浣餘
講德朝廷過地節
傳經弟子有相如
見秦
宓傳夫君素擅銀鈎美
肯問王家野鷺書

再用玉叔韻奉答

詩思江春下峽濤元龍久已自人豪能令夢嶺雲爲壯
忽憶峨眉雪轉高地遠爭傳司馬難時清厭續左徒騷
懷中小草君應識豈有幽芳答漢臯

寄壽子與觀察丈六十二首

著成中論日逍遙遲晚功名始自超亥足步過天一半
弘年策射漢三朝籌從海屋添來易夢近僊山景亦饒
爲擬平原歌柰樂婀娜軒冕向青霄

其二

與君通籍便相親者指應劉更幾人春雪倡來無後輩
風波閱盡有完身蘭芬藉藉留三楚棠色陰陰徧七閩
不獨爾書天上下還聞抱送兩麒麟

君未有子用
徐卿事爲祝

用晦走使以新詩古陶杯見貽且云有丹竈之適
聊爾附答并致意孔陽

雙魚不道溯波遲剖出關情錦字詩豈是更生丹鼎就
能將叔夜酒鎔貽從君白髮迴他日借我紅顏駐少時
見說從昆曹袞似可能新賦婉陳思

宗良王孫舊示嚴氏毀先公三密啟今復遠辱新
詩一章見貽感而報謝

尺素銀鈎已再傳每驚朱郎有朱絃重歌大澤驪珠句
忽憶先朝貝錦篇死孝愧心還此日神交屈指定何年
知君未少龍淵氣自上參峯望斗邊

孔陽宗侯貽詩見贈侑以二鸚鵡杯答謝一律

白雲叢桂亦悠哉紫氣洪都黯未開祿薄可聞宗正法
詩新誰念小侯才幽懷巢父珊瑚樹遠信君房鸚鵡杯

我欲攜將習池上銅鞮聽盡始歸來

中丞子才以詩定交及余季子聊此報謝并贈懷
中興作者競紛然隻字誰堪藝苑傳我已無譏安鄧下
君應不愧在王前秦風秦後知強弱郢雪談來失後先
自是連城勞品第那曾雙壁擬藍田

華山青柯坪而上自昌黎窘後少登者二十年前
于鱗至絕頂敬美今嗣武賦以壯之

青天陡絕青柯坪誰復能從坪上行千載猶煩華陰令

獨游惟見濟南生蓮花不作人間色玉井長驕世外名
今日季方饒勝具笑他韓子誤垂銘

舍弟敬美自秦來鄖談登華山之勝有作

蕭蕭倦馬出藍關怪爾烟霞滿客顏見踏青鞋尋勝去
高從白帝問真還毫端彩自金天掌眉際寒分玉女鬟
幸是茅龍元有二若爲相引離人間

與敬美少參登太和絕頂二首

季夏朔日涼翛然我攜叔申朝上玄雙壁乍聯堪代月

九閨初近莫談天，青羊澗暖虹腰度。
白馬巖高，練影懸暫似五城鰲頂會，詰朝分手，傍風烟。

其二

無妨蠟屐並登危，碧漢泓澄欲四垂。
極北三尖疑華掌，天西一抹是峨眉。
靈風暗送雙成管，宿霧初收玄武旗。
已是壯游殊未快，何如納節領真祠。

敬美尚寶使秦有江藩之擢，取道鄖陽，言別聊爾。
有贈

秦川杳靄一星稀，奉使仍聞有賜緋。
但喜銀魚新佩好，不論金馬舊游非。
風迴麥嶺棲鴻獨，雲滿襄江去鷁微。
寄語高陽諸社友，醉翁何日不思歸。

舍弟自均州城樓別後道寄二詩有感，輒和。

高樓一望思漫漫，兩地江山酒未殘。
欲數對床俱夢境，嚮來攜手是愁端。
詩成玉體君其愛，書到銀鈎且自寬。
若遇故人論世路，華陰雖險不爲難。

答匡南鎮國兼戲寄其甥彭先輩

秋風鼓舵乍移襄矯首停雲思渺茫忽有寸珠來漢浦
居然叢桂隱淮王詩中一字見隆準枕上千金是異方
見說匡山攜杖後可能磯畔喚彭郎

請太室兄爲代而不能俟賦此寄懷

來往魚槭問合離翻從得代負心期誰能納節仍留滯
爾爲攀轅合到遲開府轉應饒杜癖腐儒那敢詫蕭規
馬頭南去如鉤月唯許襄江峴首知

詠物體

余不喜詠物詩至於七言近體尤絕不爲之懼
傷體裁故長夏無事家園景物頗成爛漫魚鳥
親人亦自足憐因戲各賦一章合之得六十首
并舊作六首別成一卷老翁塗抹作兒子態終
不似也

梅花

窈窕娉婷白玉膚立殘清照角聲孤隴頭風起家家雪
庾嶺人歸字字珠南國容華愁易老中原消息夢還徂

東君大許羣芳在次第冰霜問有無

紅梅花

瓊姿元自傲冰霜

瓊紅玉也

不作東風桃李腸舞罷轉憐如

意點歌殘別擬壽陽粧瑤池月上僊人醉洛浦霞生帝
子狂爲問胭脂山下雪可翻新譜到西羌

桃花

度索山頭春正奢安期玉棗並如瓜誰留漢殿千秋核
瞥見秦人萬樹花枝動乍沾眉際月蕊殘微破臉中霞

莫嫌蜂蝶無才思聞道東鄰有宋家

李花

鄆曲千林花事新一枝嬌婉出風塵歌穠處處停游妓
報玖時時憶故人露井謾爲桃悵恨烟江未損玉精神
君聽大業歌中語只有楊花泣暮春

梨花

暖雪柔芳出錦除怪來蜂蝶盡揶揄晨粧未散垂垂粉
晚淚初勻簌簌珠愁對峭風時欲語夢回殘月意同孤

莫言零落無人問自有冰心在玉壺

玉蘭花

結綺張星曲未闌開簾一笑萬花看霓裳夜色團瑤殿
露掌清輝散玉盤自是藍田通別種不同湘浦怨春寒
揚州觀裏空如雪爭似儂家幾樹殘

杏花

誰剪僊人六出花從教春色倍妍華移來上苑霞千樹
種就河陽錦萬家破萼東風青旆曉亞枝殘照玉鞭斜

曲江舊是題名侶零落孤村謾自嗟

牡丹花

雕欄曲曲寶粧成步障春風十里輕陳氏君臣爭結綺
楊家姊妹總傾城千花奪笑俱回臉片蕊迎酣別繫情
最是洛陽新上巳誰能不唱麗人行

王太史宅賦得綠牡丹

洛陽名園十萬家天香國豔自爭誇何如王子緱山嶺
別有僊人萼綠華秦女曉粧將掩鬢曲江春讌剪爲紗

姚黃魏紫應無限併作山城五色霞

又賦綠牡丹

百寶臺前百豔明號家眉淡轉輕盈狂蜂採去初疑葉
么鳳藏來祇辨聲自是色香堪絕世不煩紅粉也傾城
江南新樣誇天水調笑春風倍有情

海棠花

簾幕沈深白日長一枝嬌豔占流光輕盈着雨難禁態
縹緲紫烟欲斷腸全似太真初起睡微輸合德有生香

昌州應是施龍腦莫怪當年刺史狂

芍藥花

露浥風翻茜欲流盈盈溱洧布芳洲誰家士女來相謔
何處王孫不少留嬌似芙蓉還怯水弱於叢菊未經秋
惟應摘取玄暉句消破春風爛漫愁

杜鵑花

蜀魄何年別錦城洛陽春事劇縱橫扶枝細碧娟娟靜
坼蕊妖紅的的明啼血自疑新染袂陽臺無復舊歸聲

如何百羽稱尊後不向烟花暫主盟

繡毬花

淺白微青豔更柔淡烟輕雨施仍收流蘇帶緩初成結
翡翠簾垂半壓鈎悞馬軟塵香自滾窺枝團月璧俱浮
蘭臺任更吹多少不結丁香一段愁

紫藤花

蒙茸一架自成林窈窕繁葩灼暮陰南國紅蕉將比貌
西陵青栢結同心裁霞綴綺光相亂蔓雨縈烟態轉深

最是纏綿長到老羞聽澤畔女貞吟

石榴花

扶疎一樹雨嫣然
細萼丹鬚倍可憐
貢出塗林朝日媚
栽從積草夜燈然
共誇博望槎中實
還記河陽縣裏篇
雨露恩深多結子
紅顏薄命幾時傳

題石榴

安石托根知自遠
扶南壓酢別成鮮
合歡枝上青猶綺
百子池頭紅已然
初疑宛轉珊瑚墜
復似的皦火珠圓

試問圖君北堂上何如玉樹謝庭前

薔薇花

內史臺中露未晞宜春館裏烟霏微輕苞不雨俄先坼
冶蕊無風恒自飛倡女摘條愁措指歡期就結畏鈎衣
微吟柳惲新篇罷瞥見斜陽燕子歸

蓮花

若耶溪畔多分菲鏡裏紅粧天下稀映日千霞難辨色
迴風一水不沾衣妖童奏曲橫橈去冶女銜羞戴葉歸

何似儂溪爲屬玉年年花底一雙飛

茉莉花

小立亭亭度夕陽冰肌却洗市門粧
目成還擬昏黃約鼻觀先參黯淡香
自是維摩羞薝蔔虛勞樂府詠都梁
應憐舊侶顏如玉瘴雨蠻烟總斷腸

夾竹桃

一枝幽豔兩分柯豈比長松附女蘿
有節不愁春事晚無言自擬歲寒過
枝枝上苑啼紅頰葉葉清潭寫翠蛾

好似王家佳子弟隔江團扇唱儂歌

又

爲以幽姿淩雪霰不將僂骨傍風塵輕迴粉面依蕭史
細裊瓊琚似洛神棲鳳錯疑瑤海實化龍還憶武陵人
肩輿徑造無煩主怕有漁郎指避秦

蜀葵花

萬里錦城通道遠十年金井沐恩深幽蘭空谷各從好
勁草疾風知見尋不獨秋霜能衛足由來朝日便傾心

殷勤好誦虞蔡賦笑殺相如漏上林

蘭花

十年憔悴傍靈均
澧浦傳波色尚新
總爲握香誇大國
可無含意托幽人
榮庭秀奪三花曉
紉佩芳留九畹春
我自當門逢棄擲
敢將時調怨沈淪

桂花

五嶺秋清瘴欲消
尉佗城外鎖峒嶠
金鷺岫暖花爭發
玉兔宮寒葉未凋
明月自吹靈隱粟
白雲誰誦小山謠

天香莫怪誇君採曾躡仙人上漢橋

菊花

三徑雖荒爾尚存故將秋色點衡門
千林落木誰堪殿
九日浮萸迥獨尊
甘谷可延胡傳考
沅波誰返屈生魂
何如且向東籬下
潦倒支頤付酒罇

萱花

離離朱蕊傍雕欄
雨葉烟跗夏未殘
無酒此鄉偏淡蕩
有書從竹共平安
花開錦里名長樂
樹出嵇家號合歡

何以北堂常植此三荆同擬百年看

酴醾花

暗香柔態出風塵未取蒙茸刺眼新
粧粉不隨朝雨盡
額黃長傍晚山勻六朝清詠傳倡女
三殿芳醪徧從臣
記取落英收拾後流蘇帳底有餘春

佛見笑

曼陀優鉢總堪疑上苑何由借一枝
爲問天華拈法處
可當迦葉破顏時
給園初果知難結
色界孤根未可移

肯爲東君怨搖落因風片片浴香池

水僊花

瑤池消息路還通
謫籍初分弱水東
吟罷冰壺秋片片
摘殘珠蕊夜叢叢
霓裳舞奪唐宮月
紈扇歌留漢殿風
零落總如交甫珮
漢江清夢曉來空

草芙蓉

江浦波心千葉殘
江干木末萬花酣
夾城含露輝天仗
高堞垂霞護錦官
歡似美人臨鏡坐
愁如思婦怯衣寒

幽懷一片憑秋月桃李如今夢已闌

玉簪花

湛湛娟娟白露漙折來纖手映俱寒斜依阿髻千絲髻
好傍芙蓉七葉冠擁坐金釵愁自失辟塵犀導懶同看
佳人別有貞心托倚遍東風十二欄

老少年

秋色空庭媚眼明嫣然衰葉轉盈盈虛憐夏女能傾族
恰比徐娘尚有情裛露丹楓聊借潤拒霜黃菊肯同盟

春英三五曾塗抹
短蔓長條恨已生

蟠松

峭蒨青蔥滯不消
蒼然嶽色滿庭臯
虬髯欲振千林月
鳳吹遙翻萬壑濤
摧挫冰霜心自保
屈盤霄漢意徒高
堅貞欲有劉生詠
憔悴逢人用解嘲

梧桐

青蔥峭蒨秋十尋
髯松篠竹雲沈深
阿閣天空鳳雙下
吹臺風歸龍一吟
已聞嶧陽足遠調
復見露井饒清陰

倉皇繫下荷拂拭未孤銜恩一片心

苔

小徑時荒轍跡稀坐看蒼翠欲成圍封雲石峭寒生髮
過雨庭空濕作衣露井紛紛殘月上斜陽點點落花飛
長門亦自經年合玉輦于今事已非

菖蒲

曾聞異種饒嵩嶽又見樞精應玉衡老去乾坤專一室
少來泉石便同盟仙人數節真堪餌怨婦憐花枉得名

欲向韓終爲弟子還丹未擬付誰成

芭蕉

亭午方床鹿夢過起看紗碧上文波琮琤半雜淇園竹
搖曳仍疑下澤荷太液風低初捲袖陽臺雨細不沾羅
莫言彈事休文苦聽罷秋聲恨轉多

西湖柳

萬條金縷弄輕柔纖雨籠烟不自由皎似王恭初月下
宛如張緒舊風流眠腰只益閨中恨窺眼長牽陌上愁

元是白公堤畔種可能無夢到杭州

雞頭

百子池頭波渺茫溫柔一種別爲鄉移從合浦珠初軟
采出藍田玉更香漫道青精能駐色虛勞白石強撐腸
君看自是真仙餌不乞中黃太乙糧

弇州四部稿卷四十三

欽定四庫全書

弇州四部稿卷四十四

明 王世貞 撰

詩部

七言律四十一首

櫻桃

纍垂韎韞青林端
鸚鵡銜春春未殘
粲似玉姬微啟笑
煜如金母乍成丹
栽來並耀明光殿
賜出騰輝赤玉盤

不獨葡萄先讓色玉門澄耐有餘酸

枇杷

叢黃的皪散青森五月珍苞出上林初似金丸能辟鳥
復如崖蜜有來禽夏熟共傳司馬賦秋風還記栢梁吟
祇應祠廟登新日不分含桃寵獨深

楊梅

吳筵餽飮應無限不及楊家種最奇焰焰晴空燒鞞鞬
澄澄嘉露滴臙脂虛勞驛騎傳桑椹忽憶冰盤薦荔枝

散髮風林三百顆可如金闕拜恩時

葡萄

消渴秋風癡欲蘇珍苞真擬勝醍醐
朝華露結房中液
夜色星完帳裏珠
西域酒香眠校尉
上林宮就舍單于
君聽魏帝當年詔
擬向甘泉借一株

橘

曾因騷客稱嘉樹從此芳名筐篚間
淮浦孤踪一水隔
洞庭千顆兩峯殷
烟霞自與長生液
霜霰翻朱漸老顏

碁局便須相伴住未煩塵世訪商山

佛手柑

萬里烟波貢越船上元燈火禁中傳
嶽蓮遙聳排空迹
金粟曾看授記年自有色香通妙諦
欲將清苦味真詮
漢宮虛擢銅僊掌消渴文園病未痊

竹筍

大陸千林紫氣間野人零露荷饒還
春盤玉並佳人指
曉殿星分侍從班鳳尾擘雲迴白日
龍鱗過雨坼青山

亦知饒口渾無厭剛道淇園秀可刪

孔雀

伯父園中曾
畜予猶見之

炎德由來應火離即看珠樹一雙棲
葳蕤翠葆栽金剪峭蒨丹塗間碧泥
咸陽公主蕭史曲廬江小婦仲卿妻
十里徘徊君一顧應傳樂府有新題

鷹

獨立高秋迥不同金眸青骹氣殊雄
衡飛大陸千林偃側瞬中天萬羽空
乍可羈栖間白日寧因飽去憶秋風

君看萬里封侯相此日真成出塞功

黃鸝

綠陰春淨繡簾空媚眼金衣調轉工
睨睨坐應過白日閒關疑復訴東風
遷喬出谷聊相慰止棘翻花故一叢
莫道君王渾厭聽上林新有鼓簧宮

白鷗

紺趾霜毛亦太奇亭亭孤立夕陽移
雞羣欲挽難爲色鷗侶雖盟不並姿
琪樹寸紅分歷亂碧潭雙玉照參差

知卿久擅南州譽曾記開元李白詞

鸚鵡

翠領丹黔舊復殷空庭脉脉自成閒
高懷春草洲邊賦歸思秋風隴外山
金鑠欲飛愁掣搦碧紗無伴訴閒關
君恩約畧知多少還似長門閉玉顏

鶴

伏頂丹砂天下稀欲栖珠樹復騫飛
緋山一去無今古華表千秋有是非
碧海天迴俱遞響白雲風剪自成衣

君侯縱有乘軒意不愛人間骨相肥

畫眉

驕飛初傍上林春百舌黃鸝鬪巧頻白雪似侵風裏調
青山仍隱畫中顰爭誇京兆雙彎嫵別取成都十樣新
豪興未除吾計得平陽歌舞不須人

八哥

屈戌春寒楊柳烟雕籠愁閉自年年曾教府掾吳兒舞
好聽參軍蜀國絃欲語畏人還刺促多才翻更恨芊綿

烟霞極目空惆悵笑殺韓生感遇篇

鴛鴦

翠領文綃淺着緋軟波芳渚自依依生憐蕭史前身是
長向韓朋故冢飛璧月聯窺秦殿瓦銀燈雙上竇家機
烟波最好翻新曲聽罷吳儂並手歸

鳩

昵昵春風牆外枝憐晴訴雨立多時可能如鵲巢誰補
幸不爲鷹眼尚疑垂老厭扶青玉杖微官猶戀白雲司

長安耐有饑鳥在大可相將集鳳池

鵠

綺質霜毛種種殊飛鳴元只戀庭除
籬邊尺鷃聊同適
韝上饑鷹故不如
怖後長依阿育塔
馴來還寄曲江書
相看總是銜恩侶
翹首雲霄思有餘

爲人賦白燕

掠水穿花拂畫梁
此星方合字瑤光
珠簾不辨差池影
玉樹長銜旖旎香
明月張樓衣是素
昭陽趙殿粉爲粧

零陵一片無情石
巫女風多也學狂

雉

恥入雞羣莫見欺
春風麥隴錦灘涯
文明自古非無象
耿介由來不可移
萬里越裳開瑞貢
千秋陳寶有雄祠
離絃不作朝飛曲
要聽鐃歌第幾辭

猿

何處翩翩白面郎
曾從說劍學穿楊
懸崖百尺能通臂
過峽三聲早斷腸
啼入商秋天似水
坐當清夜月如霜

欲將煩惱消除盡
銜果還須禮法王

鹿

奉車猶憶上林秋
中歲辭榮在一丘
萬事從他誇指馬
一身甘自任呼牛
失來秦苑誰堪逐
歸去吳臺好並游
世路未馴從此決
長林豐草且銷愁

兔

自許千城動主知
莫將三窟負心期
梁園雪霽懸宜日
桂殿天空搗藥時
好向中山傳鳥跡
毋煩東郭代盧悲

金天倘許榮光借擬上君王萬壽卮

朱魚

咫尺清泠一鏡收明霞點點在中流驚鱗忽捲桃花片
勞尾徐牽赤玉鉤萬里江湖寬出入半庭烟雨足沉浮
翻波菡萏時相傍窺沼鷓鴣迥自愁

賦得雙塔寺

白馬西隨漢使回招提對聳古燕臺摩空日月金輪轉
分界河山寶樹開法鴈影從天外合燭龍光並夜深來

紺牙青髮同歸化朱網丹楹總劫灰

賦得秋夢

愁聞盧女寵流黃露井銀牀夜未央漏斷朱門花底月
析寒青海樹頭霜逢時宛轉歡娛隔覺後蒼茫道路長
不信狂夫能憶否欲乘雲雨問瀟湘

署中獨酌先後共得十首頗有白家門風不足存
也

醉即高眠醒便歌世人無計奈吾何一餐魚菜欣然飽

雙眼鶯花到處多夢裏乾坤誰束縛閒中風月任差科
唯餘氣習消難盡強半陳編與耗磨

其二

九十韶光半已孤攬衣推枕自支吾詩名不傍新詩長
酒病全須濁酒扶漫笑吳兒書咄咄虛勞趙女和烏烏
蒸酥細薤香杭飯爲問先生得也無

其三

北風黃葉擁柴關捫腹徐行且任閒誰把一麾留白日

仍將七尺施青山玉門都護求歸印司馬江州泣賜環
何似蜚螯依右手拍浮長在酒船間

其四

五熊幡底綠沉槍紫綬雙垂琥珀光未轉頭時空合鬧
纔開眼處自禁當儀秦豈必謀終日劉項都來戲一場
此際青天殊欠穩蓴鱸秋思兩茫茫

其五

我是經行舊比丘曾參龍象度春秋修時早被魔心打

到處還將宿業酬一刹那間過幻跡百由旬裏徧窮愁
何當收拾無生後澗底桃花水任流

其六

候吏聲參散晚衙忙呼稚子作生涯月臺先掃堪眠石
風徑還收乍墮花官印斜封桑落酒鄉書遠寄穀前茶
青絲翠管非吾事獨酌狂吟興未賒

其七

點檢平生劇可憐還從束髮滯幽燕看雲桂樹慙高隱

走馬章臺負少年依舊青霄偏燕領不教明月試龍泉
傳聞上界多官府倘似人間亦杳然

其八

二八眉顰舊出羣羅衫斜絰藹蘭薰弓弓窄窄雙窩玉
裊裊亭亭一片雲曾爲催花煩羯鼓時因鬪草浣湘裙
而今拋擲同秋槁可向陽臺夢裏聞

其九

夜牕無語一燈前南斗闌干北斗懸數盡蛾眉何處隱

笑來雞肋儘堪捐
酒徒頻勸眠千日
禪伯相要坐九年
此事甚難吾不會
且將雙屐了殘緣

其十

方牀細簟少塵埃
午倦拋書蝶使催
蕉影曹騰勾暫住
竹聲敲戛喚仍回
主盟風月應誰讓
畧江湖未有才
看盡落花無一事
自支鐺足煮新醅

信筆爲雜體三首

春來只自任陶陶
有口那煩誦解嘲
十畝種稭百畝秣

左手持杯右手螯紅榴日炙難安帽綠蕪風起欲翻舫
醉即借眠眠又醒不知何物客星高

其二

一番花競一番新五度門閑五度春風外游絲塵外事
雨中黃葉夢中身病堪醫療難言病貧假分疎未是貧
莫向向平輕有約挂冠人是倦游人

其三

江雨難周高下田江風未便往來船西舍次男仍遣戍

東鄰中婦復調絃白衣居士眼無恙造物小兒心可憐
祇應點檢牀頭酒齊物莊生第一篇

戲爲江左變體

朱雀桁頭空繫舠玄武門傍難上潮三眠三起人如柳
一年一度鵲爲橋懶粧人道孫娘髻廢飡儂學楚宮腰
秦鏡照膽那照苦漢酒消愁怨不消

其二

二八薄命私所憐嫁得燕頤復爲肩樓船將軍難問地

戊巳校尉不論年銀缸送影聊暫對繡茵分寒仍半偏
賤妾紅顏坐來變安能君心常宛然

右十五篇調格稍異聊存之以見一體

七言排律二十四首

送德甫行部越中

使者輜軒亦快哉高名金虎署中推十年未數爲郎拙
三尺仍勞聖主裁此去懸蒲應自慰人間刻木漸堪哀
江潮揭地千門轉海色摧天萬艦來飛檄盡銷兵氣盡

按章春傍使星迴莫將風雨疑吾道且仗河山縱汝才
檇李詩成吳子郡折梅人在越王臺薊門何限如澠酒
愁對繁花不敢開

過于鱗郡齋分賦十二體

得名字

春草驂騑出帝京如何握手又孤城主恩司馬郎仍在
客禮元龍坐盡驚稍爲清樽驅黯澹漸攜孤抱鬪崢嶸
朱絃曉並漳河色白羽秋閒漢塞兵聞道太行兼郡事
始知嚴助厭承明新篇直已藏機甚怪爾猶存海內名

冬日同客游李太常伯華諸園

窈窕縱橫事事宜還如谷口動京師幽亭護竹尋難徧
寒日穿蘿裊易垂徑盡樽醪時一引坐新鐘鼓不須移
風林忽送青山色霜榭俄低白雪枝歌罷纏頭珠錯落
舞殘垂手玉逶迤城隅杳響催逾勁席裏杯行慙莫遲
四海烽烟客汝老百年丘壑爲誰私須留麈尾聽玄講
未許悲吟伏櫪詞

戲賦後七夕

牛女佳期已惘然誰留餘閨薦新緣重徵駕鵲愁難信
却浼奔龍苦不前娟娟桂色初驚面習習榆芬乍殫肩
恨殺朱明金作轡還酬白帝玉爲錢解道千年無此夕
莫將今夕望明年

贈徐汝思統山東民兵

除紙纔看出建章長繩便擬縛名王相逢明月樓中嘯
小出春風陌上桑六郡良家紫騮馬三齊擊技綠沈槍
揮毫坐奪燕支色橫槊全收瀚海霜龍額但誇金印大

虎頭休恨玉關長調笑青州王節度年年書記滿胡牀
候臺長山彌日信手撥悶遂成十四韻

病起孤城罷吏參不堪車馬日驂驔五違燕雪寒沾珮
四見齊楊碧吐簪歌就馮驩雙短鋏書成殷浩一空函
亦知刀筆文無害其那衣冠懶不堪公譴縱然饒歲百
人情終是與朝三名同牛後難爭長路絕羊腸未弛擔
入夢風塵牽塞北思歸春雨暗江南青雲處處皆先進
白雪人人了不談溫樹祇容溫室種漢新元擬漢臣甘

驅來鳥雀孤鷗飽戰罷檀槐萬蟻酣
甌壁藤梢驕自得拒霜松骨短何慙
且將玄白朔揚子未許雄雌問李聃
自古浮名身並患于今奇字酒同耽
欲知送老藏榮處西塞山頭小築庵

壽李宮監

二十承恩拜奉車年年青鬢侍彤除
天閑乍給新調馬御帶仍懸舊賜魚
清切星辰紫劒佩鬱蔥雲霧裊簪裾
入朝花奪宮袍錦下直藜分祕殿書
曾爲脫驂知越石

未應題賦薦相如金莖大有長生露乞取君王萬歲餘

殷子以七言長韻見投聊抒鄙懷奉答凡二十韻

憶昔翩翩鄴下游當時七子許應劉狂來走馬傾三市
醉裏停鞭傲五侯薄宦浮雲工變異新詩真宰泣雕鏤
玉摧寧望全於瓦弦直元輸曲似鈎搖首中原無劍客
戢身滄海有漁舟懷將池草難成夢種就堂堂不改憂
解艾未須援塞馬誅茅翻擬愧巢鳩行藏懶就先生卜
姓字甘從醉尉留頗爲酒饒祛物態豈緣書就減窮愁

長林草坐呦呦鹿急浦萍眠汎汎鷗盛世老農兼老圃
殘年尋壑復尋丘縱憐折節因家難實恐偷生重士羞
此日深源多慷慨何人方朔並沈浮春迴白雪三湘色
天圻黃河萬里流意氣百年誇燕頷功名十上敝貂裘
哀梨我解毋蒸食和璧君堪再暗投吹出埧簾殊更苦
操成山水若爲酬連城價溢秦王殿大國香從楚客洲
寥廓雕盤爭健翼康莊驥逸騁華輶衡門久自疎車騎
崩缺今真犯斗牛去爾隻身終五嶽微吾片語失千秋

酒房戲爲長慶體示四郎姪

且問吾家小杜康
潑醅濃醪許誰嘗
軟炊新稻真珠粒
細壓寒槽白玉漿
瀉出流霞偏讓色
滴來甘露有生香
休論染指涎先下
任遣持螯手自忙
晝要督郵缸底靜
宵防吏部甕頭狂
十年奔走愁爲伴
萬里歸來醉是鄉
席上清樽仍北海
城中舊侶有高陽
秫田已滿七百斛
泥飲從今三萬場
漉後葛巾堪倒戴
頽時藜杖好扶將
憑教卵酌還丁夜
不擬人間喚索郎

戌亥之際有聞偶成一首

春來負癖近膏肓盡日揩頤不下牀但是世情容懶却不教年事向愁量滄桑變後身難定蠻觸爭來地已荒冠蓋幾家狐父里文章若個夜郎王才憐夸父追炎飢依舊陽鱉擁釣忙學佛又投多寶座尋真先試化金方沽將濁酒新狂水檢罷殘編古戰場欲向太湖栖一曲建成車馬聘東黃

薛文學瑞室

文學之祖在宋居室再被火不然名之曰瑞室
于鱗爲四韻余乃加二焉

君家舊事重黎後

薛常屬楚

可怕明州夕火紅一見赤尼逃

賈相再教青婦助麋公澄師酒作天門雨佛影龍回石

窟風懸壁安車欣自若

君家廣德故事

汲雲盃井靜無功巢泥

百代長帡燕藜杖諸孫更吐虹却憶上林多屬玉只今

何處有遺宮

屬玉漢宮以却火

途次投贈少師徐相公南歸七言近體六十句

臺閣頻年秉化鈞，俱將謨訓比絲綸。
鴻逵夙表儀端羽，驪海偏嬰領下鱗。
兩詔中興光日月，千秋顧命見君臣。
丹衷自委金縢祕，赤手重扶玉座新。
百揆始知明舜目，普天原只頌堯仁。
戟門晝敞恒如水，掾筆陽迴總是春。
已見辭侯超博陸，肯教閣儼平津。
商巖徧起成霖澤，宣室長局絕鬼神。
蒲類畫波鯨頓偃，越裳梯嶺雉能馴。
從他得序同升在，不爲流言引退頻。
歸到穀城黃作石，掛餘神虎角名巾。
崢嶸皂蓋騰馳傳，燦爛朱提捧賜銀。

內殿恩傳衣錦勅東門淚滿望轅塵九邊蕃將爭務面
八座尚書未展顰去國身輕憑款段憂時鬢在寓麒麟
鵬休六月方爲息蠅點連城反見珍置酒可同疏傳縱
脫驂仍念越生貧榮庭蘭晚芬相襲入眼荆花晚漸親
三泖水疑增浩蕩九峯山忽聳嶙峋那堪綠野栖遲地
轉作蒼生顧盼身聽履定誰攀赤舄懸車應即改蒲輪
蓬心下澤知難變蒿目中原忍更論天地會當交泰否
雲雷須自要亨屯功名再續中書考風俗能還上古淳

此際平原投謁士嚮來丞相掃門人沈湘些就音猶楚
扣闕書成哭向秦病草遠能沾雨露瞻槐高竟隔星辰
山公實已憐嵇紹谷口寧容卧鄭真浮譽總爲周地璞
孤踪甘積漢家薪何時得托支離樹長伴莊生祝大椿
新安汪惟一徐子與門生也李于鱗作長律題其
竹丘卷云截作武陵溪上笛方知馬援有門生惟
一出以示余則于鱗仙逝矣感歎之餘輒步以贈
萬竹霜秋逼坐清一丘君計已垂成揚州篠簜真爲美

王氏琅玕舊有名
圻地蒼鱗爭峭嶺
干雲翠尾出崢嶸
中山鬱作龍蛇走
嶰谷裁將鸞鳳鳴
若遇嵇康須把臂
偶同張廌欲逃榮
渭濱業就封堪素
梁苑篇高席不爭
欲識汪倫歌日面
還憐李白醉時情
武陵何限傷春語
併入山陽笛裏聲

輓故温州郡丞閩人黃公釗

還因禮樂借登壇
力盡驅馳轉更難
麾下虎符徵未合
匣中龍劍恨誰彈
偏師欲奮長纓請
匹馬能衝組練殘

剗後景卿空有舌哭回弘演已無肝從他一蹶星同隕
留得孤忠壁自完百粵風神開廟社七閩精爽傍衣冠
丹心日月天俱捧紫氣虹霓海並寒爲道鯨波諸稍戢
只今重譯滿長安

送談思重太常北上

三月江南花柳齊玉壺移餞慧山西稍聞隱酒辭金馬
仍見爲郎祀碧雞宵向受釐天語得朝看陳祝御名題
鑪香自裊烟雲上黼座傍瞻象緯低艾綠袍文紫瑞鵲

水蒼珂色壓青驪
騶從鹵簿班前引
烏憶中丞署裏啼
太常車在鹵簿內君父嘗爲御史中丞
唯是清齋三百日
可能今日醉如泥

歸自胥門會子與自滇南入賀有贈

初聞單舫駐官河
喜極翻驚淚眼沱
名士風流垂欲盡
故人星聚擬如何
蕭然短鬢爭秋白
少選衰顏入夜酡
六詔天留雙劍合
五湖人借片帆過
裏蹄繡錯鐵如意
琥珀光淩金叵羅
出篋寸心同解脫
拜嘉雙眼爲摩挲

吾安鴈序聯耕耒爾道龍標有荷戈漢典可仍金馬祀

夷荒曾嗣白狼歌寵王恩數新當減

黔公事

司隸威儀舊

不它太華也應蓮掌色昆明亦否石鯨波先朝玉帛嵩

呼盛今代衣冠禹貢多

君以賀萬壽
入改賀登極

三事舊游如見及

第言樗朽合烟蘿

寄鄧兵憲

治郡功名不讓黃鴈書頻見下明光誰將吳地隨車雨
去作閩天列戟霜射日龍文開組練騰波鯨血偃餘皇

何人不借寇河內有父唯呼鄧護羌童稚至今期竹馬
東南是處愛甘棠知君豈假謳謠重總爲驪珠逐孟嘗
尚書學士吳興董公過小祇園作

驚傳星象傍吾廬孺子能勤長者車林竹選留詩句後
石苔開識履聲餘先春麗藻爭思御及暝玄言轉自舒
不獨馬曹堪拄笏從他學士也焚魚扳留一水元衣帶
惜別孤蟾似髻梳爲約把杯揮塵地五陵車馬萬花初
余赴太僕北上宴督漕王中丞新甫所感事有贈

青燈濁酒坐相酬感事驚心論舊游
犯斗故憐雙劍在照車先讓一珠收
母驚粒玉我珂集不覩臺金蹀躞愁
愧我老非張萬歲念君功待鄂千秋
天空首宿霜難飽春暖桃花水自流
任是同書稱太僕何如計相拜通侯

寄輓黃淳父丈

時與索魯望計同至

少微東壁兩星虛偏落吳江恨有餘
見失奉高猶自可聽亡叔度轉愁予
松能傲雪還成槁蘭豈當門也自鉏
若個曾偷江左集何人不購永興書
牕前穀雨分茶鼎

牒底春山却筍輿種種風流今日盡可應南望不欵歔
同日得承天曾丈參知及其子以三中丞蜀中書

山城幕府歎離居朋舊青雲積漸疎湘浦春深誰附鴈
蜀江南下不通魚方愁晉代浮沈語併得殷侯父子書
隻字造從倡雪後寸牋裁自浣花餘銀鈎並美看難辨
玉案雙酬愧不如益部只今徵小許鳳毛池上莫教虛
大司寇王公扶持太夫人馳傳還里賦此爲贈

將母仍爲畫錦身親從玉殿捧恩綸旌旗自北風雲近

花柳從南雨露勻出入兩朝中執法起居八座太夫人
萊衣姓老看還少粉署名秋別有春桃實供從王母舊
履聲聽識鄭公真那應北斗虛喉舌共望中台領縉紳
明主總深烏鳥慰可能無意畫麒麟

助甫攜見甫過鄖鎮留飲喜贈

握手踟躕惜鬢絲且先呼酒後論詩文章李益難終賤
兄弟岑參並好奇珮玉享來元自蔡領珠投罷即稱隨
君自蔡來投我
詩隨余屬國也青油幕下堪移日玄武峯頭合後期
君約

太和後至折節客驚麋子地跳梁人憶虎丘時年光並得偏

吾老春色從公到汝遲

癸酉錢君虎丘

但是詞人陽九過無妨

物態暮三疑欲酬荃蕙須防化莫遣東風道上吹

敬美尚寶弟以七言長律卅句及洪崖圖古方壺
爲壽倚語作答數亦如之而悽然之旨殊矣

叨開制府國西陲聽說懸弧已自悲晚得一城如斗大
可云千騎上頭宜交同矍圃三差在跡似湘峯九盡疑
地遠青山無捷徑天寒白雪有連枝洪崖畫蹟開元代

梁苑疊樽武帝時萬里併將棠棣頌百年先廢蓼莪詩

夜聽風雨牀難接春勒池塘草更遲五短久應輸散騎

摩詰薦弟縉謂已五短
縉五長徵拜散騎常侍

二難端合避僧彌

晉人云法護非不佳僧彌

難爲兄

清朝尚璽強增秩

霍子孟事

醉客將軍謬保持

阮嗣宗事

所

願賜緋行簡並

白樂天之弟行簡俱五
十賜緋見樂天詩集

寧容剪白表微

嗤

韋表微云吾年五十拭鏡剪白以游
少年間取一班一級不見其味也

雄心老驥羞人

問小技雕蟲懶衆知今是昨非孤抱合

歸去來辭語

宦情文

思一時衰

李孝貞云五十之年倏焉
已過宦情文思一時盡矣

長憐北海如流語

北海云歲月如流五十之年公今始滿


未信平原柰樂詞

陸平原有五十時清酒漿災柰

樂何語

家有鑑湖那用乞車還下澤不言疲由來損益多

深味學易年今尚可追



弇州四部稿卷四十四

欽定四庫全書

集部

弇州四部稿卷四十五

詳校官侍讀學士_臣陸伯煊

中書_臣劉源溥覆勘

總校官原任_臣王燕緒

校對官中書_臣張塤

謄錄監生_臣李青標

欽定四庫全書

弇州四部稿卷四十五

明 王世貞 撰

詩部

五言絕句一百八十五首

衛河八絕

擊汰蕩金波流光起千鬣仰看雲間質如鈎帶殘堞

其二

河流曲曲轉十里還相喚那比下江船揚帆忽不見

其三

前望渡口驛行行轉相隔非關驛路移應是儂心迫

其四

十五誰家女紅粧嬌自多低頭浣衣坐不解聽吳歌

其五

欸乃櫓聲低來船坐自移無須苦相羨各有去來時

其六

人家半侵河屋後曬漁網夜深喚小婦篝燈聽波響

其七

青青河畔柳蕭索半無枝爲是輕攀折非關贈別離

其八

人云風波惡風波信自惡生長在家鄉那得容華落

戲爲眼罩作一絕

短短一尺絹占斷長安色如何眼底人對面不相識

題畫

來時桃花口流水二三尺一夜春雨生
森漫歸不得

其二

孤蓬知乍風寒壓澄江釣不見石室人
萬樹傳清嘯

其三

愛此山中居清陰滿蘿薜飽飯無所爲
石上坐秋色

其四

手自斟濁醪醉卧泉聲裏月午醒始知
微風落松子

飲華生茗

君攜陽羨茶薦以中冷水高卧讀離騷林端月初起
連中丞談詩夜歸題壁

縱有平生好寧容貴客憐長歌欲自聽秋色五湖烟

出門

出門見青山殷勤盡一別爾自知吾心悠然竟無答

其二

稚子牽衣裾倉皇問何事芍藥春尚花官今去還未

人日偶題

人日江南好風光梅柳新誰將故園日乞取去年人歲

人日與子
與輦賦詩

其二

出門看冰雪我我大地厚一夜東風吹宛然五楊柳

其三

誰家採桑女貂韜雙金鈿朱顏怕雨雪人日拜新年

其四

平生徐與李南北共飄零北極逢人日南天指使星

癸丑余以避地吳中登閭闔行戰地悵然有感
北風吹海色飛上姑蘇臺欲問吳王事秋深麋鹿哀
宮怨

昨夜君王來守宮辭殘血歡至方識愁玉堦盼春月

其二

小日苧羅溪紅顏不自持入宮知見妬無地着蛾眉

江口

江口安檣處孤舟盡日停秋雲無限好只傍蔣山青

其二

似玉鱸魚鱠橙絲縷更鮮徘徊欲下筇從此定何年

阻風桃源

小驛維梢坐來帆自若飛不堪游興盡欲作向南歸

林公不食書此惱之

野夫飽飯罷散髮卧南牕亦作降心計無心可待降

偶題

女郎山頭石新婦磯邊水欲吐陽臺雲徘徊傍誰起

教坊婦

小拂乾紅袖新聲十四絃不知頭已白猶唱想夫憐

無題

七寶流蘇帳金鈿與定情十年春夢斷恍惚似前生

題壁

康樂烟霞屐長房日月壺有鄉皆是醉無谷不名愚

春遊

小雨桃花逕輕風杜若洲江南春事滿何處賸生愁

閨恨

興慶坊前柳蕭郎手自栽藏鴉今漸穩只是不歸來

彈琴峽

在居庸

銀河落秋水飛峽自鳴琴代馬遙相避君聽無殺心

夜宿碧雲寺

幽人夜無寐初月銜山閣不見月出光但見松影落

雨中

時方有哭子之戚

平生不解愁雨落聽總好此際雨聲來沈沈北邱草

其二

夜雨生白髮愴然青燈語日出愁更深應知不關雨

其三

夕陽鴉背寒暝色燈花落際以訖然身那能不悲作

天雄道中

參差荆中門出沒沙際語落日銜半規秋天避禾黍

其二

場中刈新穀屋後曬軟棗兒女貪看客羣栖下相惱

其三

秋風吹將暮古道行跡稀愛此微陽色射我霜中衣

其四

道逢魏公子問客燕趙來悲歌不足聽酒人安在哉

蚤發鉅鹿道中

驅車漳水外十里及鳴雞殘月低軍壘青天散馬蹄

其二

太行一片雲裊裊復紛紛我欲俱收摘相遺邢使君

靈巖寺朗公石

朗公一片石禮拜無寒暑彈指千偈終低頭竟何語

鐵架柴

問衣何自來祖師傳迦葉不悟曹溪春居然一方鐵

雙鶴泉

雙鶴摩天去雙泉爲誰久昨夜王喬過山僧爾知不

證明巖

野夫如慧能隨緣就衣食勞師強證明本自無功德

甘露泉

曾聞尼連河世尊舊浴處一灑青楊枝人間盡甘露

錫杖泉

卓錫飛泉流人天大歡喜來既無心來止應何處止

定公堂

定公創招提鑿破青山色惜哉不住心翻留有爲跡

魯般洞

竅石爲幽居虛稱魯輸子三十六洞天天工定誰始

送內弟魏生還里

莫以齊門缺悲歌盡日彈
醉君桑落酒不敵郡齋寒

其二

骨肉他鄉別干戈遠道心
倘過楊子渡約畧較愁深

其三

暫留同爾去此語若無憑
好待蓴絲熟應逢張季鷹

其四

阿姊扶牀泣諸甥繞膝啼
平安只兩字莫惜過江題

謁臺還道逢海上宋使君戲贈

問君何爲來問余何爲返欲答兩不言青山去人遠

寄勉魏氏二甥

玉樹元雙挺鵷雛好並翻外家饒宅相若個魏陽元

留客

吏事君休怪山城好閉門此生無長物但坐有清尊

兼隱齋

爲吏復兼隱吾以名吾齋昔人解嘲耳其隱安在哉

西亭

昔邪寒不剪書帶綠如室過客雖自稀主人已非一

雙栢

良宵坐來永念此栢下雪鶴斃時一過亭亭如孤月

小洞

翳茅石罅中肱卧呼不起却謂桃源人其深亦如此

雙鹿

空庭嚙枯荻悠然亦相樂放爾長林中應思向來錯

雙鶴

飲啄行相引棲鳴炯自如主人飯脫粟爾莫歎無魚

古意

聽盡西宮漏踟躕不肯眠僊韶一派樂又過玉樓前

其二

薄命紅顏是傾城亦枉然君王七寶殿自擁少兒眠

其三

歌罷齊紈扇沈吟異代名自憐長信帚不是主恩輕

記漢童謠

蹇人欲上山秦帝欲上天假令天可上地上少人烟

爲僧題畫

別僧虎溪渡扶藜踏微月一笑春風來林花偶然發

其二

玉梁界鐵峽迸作摩尼珠不肯青山住飛流徧五湖

其三

蜻蛉櫂頭船自度還度汝一夜曹溪風吹散黃梅雨

其四

我是王弘之得魚亦不賣新水上查頭綸竿竟何在

暑日見客

客自襜褕來我當科頭出語客幸勿嫌宋人偶游越

碧雲寺泉

碧雲長在天碧泉長在山誰憐卓錫後宛轉向人間

過于鱗郡齋分韻賦十二體得傍字

腰間轆轤劍錯莫無精光不是芙蓉淺純鈎北斗傍

二慕

少小慕書生書生良不易欲以徑寸心博他千古事

其二

少小慕俠客俠客良亦難寧將百歲擲不使片言寒

塞上辭

人言塞上老不恨塞上老但恨作別時握手太草草

春日偶成

丘壑殊無恙春風故不貲冥搜徒自苦處處是吾詩

吳江舟中送子與一絕得溪字

寶帶橋頭水曾通
菴盡溪只愁歸路遠
遲日未應西

又戲爲周生代送得情字

今朝送遷客
憔悴不勝情
莫怪愁看鏡
蛾眉世總輕

偶題小園

今宵高枕處
白石含青蘿
人喧雖稍息
鳥聲其奈何

其二

蘿薜長自衣
桃梅猶未色
唯有東風來
悠然酒中得

雜咏

儂家何處是舴艋太湖頭自識人間路秋聲會起愁

其二

寂寞何人問韶顏鏡裏紅亦知年未老無意向東風

淮亭逢王子作二絕

汝從秣陵來還向秣陵去惆悵不忍離鄰雞酒中曙

其二

繫榜淮亭柳呼樽且嘯歌罷官應不悔湖海酒船多

徐荊州過余兄弟不肯飲而留連金吾許夕拜
所走筆戲之

自擲雙魚後難將五馬留祇應金許宅一榻爲南州
戲爲乜僂語

昨夜蕊珠宮冰壺弄秋月不肯玉床眠鞭龍醉中發
調張助甫三絕

宦薄無勞問居然張長公何如擲手板一棹五湖東

其二

何限青山色當君對案時肯同山吏部長醉習家池

其三

遷客真難作看人眼亦勞爲言名士業飲酒讀離騷

夏日抱病十二絕句

支枕時自言斯人有斯疾老作一蠹魚殘編送餘日

其二

傳聞三峽下白雪捲青天借得東鄰水潺湲亦可憐

其三

偶然片語出却拾囊中遺歌罷還自賞安用他人爲

其四

曉夢鐘欲殘故人枕邊別武夷山上雲白雪樓中雪

其五

雖攬千古書畏語千古事白日稍向西一事一垂淚

其六

病在何妨暑科頭鎮日眠莫言疎筆硯不索賣文錢

其七

世事久不聞偶傳北來耗遠志在東山一夕俱小草

其八

西林貝葉編東林竹葉酒問我西來意翻云醉中有

其九

客有攜枰者湛思入玄解忽悟斂子時人我俱安在

其十

客是華陽館仍云雪上來野夫名已盡只愛自銜杯

其十一

社酒鄉人至無言但一卮猶勝莫處士強我坐談詩

其十二

長卿故倦游藜牀壁間挂但喚尤老來青山隨意寫
弔張處士墓不至而返因簡幼于仲君

金閭十萬家盡醉吳山碧獨有王子猷迴橈墓田色
其二

念汝廬居地藤蘿使徑迷祇應今夜栢重見夜烏啼

郭山人六絕句

五嶽真形圖

汝到瑤池西披圖問阿母二室三花間可着王郎否

杖

僊骨日以輕何煩策扶老後夜驚雲飛棄龍在中道

衲

一衲長挂身寒暑了不涉肯學沈湘人秋江緝秋葉

瓢

偶從清潁得乞食焦山僧一飽便無事却挂焦山藤

鋤

十年理芝畝鐵作青蛇文復伴遠游去山山鋤白雲

觚

時攜一觚酒獨向花間醉不分汝南翁春風自天地

彭城道中

盡日山中行謂是山中客及逢往來者總負茲山色

道過一嶺曰米花村其名頗雅因爲成一絕

夾溪黃葉路三戶米花村車馬須臾事寒山日掩門

東明道中木冰甚

濃霜中夜零千林成霧淞却似江南時梅花惱清夢

其二

鮫淚滴青天萬樹珠相亞惟應拙宦人不作達官怕

應在明中大水後問之

可憐赤城霞釀作石梁水一郡垂欲魚卧龍猶未起

朔日邑送薪盈庭感而有賦

匏繫何煩惜膏明也並燒積時甘在下炊後始知勞

其二

本是爨下材叨君一分直不惜捐此身爲君佐鼎革

其三

念汝焦頭近憐余束濕同不才豈梁棟亦使秋山空

其四

只愛樵歌好那知有殺心分無焦尾日世自寡知音

往返錢塘江戲爲問答

九月錢塘浪無風也拍天儂今渡江去爲復住江邊

其二

朝指蕭山驛暮喚錢塘渡
儂身不屬儂却似商人婦

有感作

世情令我出世事令我歸
出處不關我安能論是非

題寒潭圖

萬木俱避榮寒潭吐幽潔
悠然見天根羣悴還成悅

題雜畫

白雲橋之上流水橋之下
策蹇不肯前蒼龍峽中挂

其二

雲作斷續峯烟爲濃淡樹借問此人寧知此中趣

其三

山色猶未斂藹然斜陽赤時有漁父來不妨一爭席

其四

濃碧蔭清漪可能不流睽釣自不得魚得亦不肯賣

其五

天河一夜雨染盡郊原綠頗怪出山雲時能礙游目

其六

儂愛峭帆風身愛且從容溪山任闊狹面青芙蓉

其七

衡門晝長掩春草綠於積倘有問字過朝來見行跡

其八

秋氣自蕭索秋山殊不貧丹楓與翠栢往往媚行人

其九

白雲不肯住裊作出山狀中有朱衣人可是山中相

其十

嵯峨插天峯，偃蹇據地松。峯那不出雨，松已欲成龍。

其十一

一樹兩樹丹，千峯萬峯白。無處覓酒家，孤舟采寒碧。

其十二

遙岑吐飛瀑，如瀉銀河水。本自愛人間，翻落白雲裏。

題紫筠居三絕

過雨千林濕，高齋色自肥。籜龍一夜長，片片紫雲飛。

其二

新篁節未解已作干雲碧偶然三徑開錯擬揚雄宅

其三

長桑夙有尚自與此君宜不獨堅貞在兼令俗可醫

襟夢三絕句

夢三日而應

夜來癡失官青山色爲動無那夢醒時此身還屬夢

其二

夢飲薊門酒忽復還鄉國猶勝覺後身匏繫太行北

其三

夢讀老親書醒來無一字稍覺孤枕寒惟殘兩行淚
江離館十絕句爲朱鴻臚在明題

松齋

鬱鬱齋畔松謾松松下風儂如陶弘景日坐松風中

雪廊

三步五步廊千株萬株雪阿大故濯濯與雪鬪清絕

石塢

壘石爲環堵主人長作主行遍咸陽西誰識黃金塢

江雲樓

高樓風不閉半欲藏江雲試問江干客或有雲中君

筠房

修竹不愛碧潤我牕中人欲知春雲坼寸寸吐龍鱗

快閣

披襟稱快哉天地雄風來何以金莖表吸取露一杯

凝香室

湘簾靜不捲芳篆縈如絲借問僊省吏得似含香時

嘯臺

欲與天籟爭披雲獨箕踞忽作鸞鳳音猶然徧千樹

鶴院

雖甘稻粱美終愛雲霄去蕙帳猶未空翮成且須住

雨花菴

兀坐淨名身時談香積因如花雨僊女知是散花人

黃生填撫南牧馬所賦二絕句送之

君過騰越峯駭骨隨龍化倘遇千里駒莫惜千金價

其二

調弓射堂下戲馬臺城側莫作王騎曹挂笏西山色

題小景

北垞帶南垞前帆銜後帆欲知何處泊斜日在松杉

憩徐少卿墓

宿草封雲壯高杉背日寒客來無劔挂事往有琴彈

題繡毬花

暫以碧雲色微籠春月圓拋人暗香裏誤馬軟塵邊

題畫蘭花

處爲幽谷香出爲王者瑞不同百草歸秋風紉成佩

江行雜詠

初出京口

楚歌一聲發吳儂雙淚漣武昌應尚遠船是武昌船

夜泊蘆夾迴望燕子磯

風吹浩蕩去却在蘆江湄燕子磯頭月清光當待誰

泊金陵

不登鳳凰臺爲怯李家句聽說長干兒朋尊向臺去
初發石頭

亭亭遠山色入我船牕來鬪語雖不競那無酒一杯
烈洲在江中樹頗多

鬱鬱烈洲樹宛然江水間行人自不上妬殺道金山
牛渚即采石也

玄暉既道往李白時一振請看滄江流萬古才不盡

宣城道中阻水不得上

夜不聞白猿朝不見白鵬

皆太白詩中語

忘却下江水錯恨戀

舟山

東西梁山一名天門山在江中

東梁與西梁鬚鬚雙虎頭可憐長江水分作川字流

病中過銅陵遇雨

江館能收望漁磯亦罷簪誰憐伏枕客風雨過銅陵

歷陽道中阻風

進步咫尺間一落不復上安得勒將軍爲我牽百丈

江行熱無魚買戲成

十日不嘗魚九日不却暑願作西南風吹儂轉鄉土

余嘗夢登九華陽山磯可以見九華而病熱昏寐
竟過志感

九華九子秀十年夢寐間那知一夢覺頓失九華山

過馬當

人云下元府莫作馬當看自有天公仗那能問水官

安慶道中

平波細若剪遠岫膏於沐嗒坐舫齋中空翠時一撲

過皖城

不問江南北江風任往還杯中是何物青峭皖公山

和尚磯在采石道士湫在蘄水小孤中立焉

東是和尚磯西是道士湫那能教小姑不就彭郎宿

祭小孤神祠作

小孤有神祠亭亭大江中行人俱賽祭那得往來風

彭澤顏明府來謁

偶然折腰罷滿路青山看却笑陶彭澤何因便去官

過潯陽

功名侮余甚厭之不能舍試問廬山峯可曉白司馬

望大孤山

人言大孤醜不及小孤妍若向鄱陽去南風也繫船

神鴉

神鴉向千載依然少陵句不學栢臺烏臺遷烏亦去

至李坪驛始見竹筏上居民連亘三十餘家云隨
流上下作蘆治板行販

何必問故鄉浮家任儂住一夜便風來盡呼鄰里去

入黃州

青衫曳地行雙眼鼻端看此豈翫世人憐爲世人翫

青山磯

武昌在前頭逡巡不肯去爲愛青山磯且對青山住

弇州四部稿卷四十五